

四庫全書

史部

欽定四庫全書

資治通鑑後編卷九十七

刑部尚書徐乾學撰

宋紀九十七

起彊圉大淵獻正月盡上章攝提格十二月凡四年

徽宗體神合道駿烈遜功聖文仁德憲慈顯孝皇帝

大觀元年春正月戊子朔赦天下 甲子中太一宮使
魏國公蔡京復為尚書左僕射兼門下侍郎 戊戌幸

興德禪院 庚子置禮儀局於尚書省 甘露降於帝

籀中羣臣稱賀 壬寅尚書右丞吳居厚以老避位罷

為東太一宮使 壬子以何執中為中書侍郎鄧洵武

為尚書左丞戶部尚書梁子美為尚書右丞子美初為

河北都轉運使傾漕計以奉上至捐緡錢三百萬市北

珠以進由是諸路漕臣效尤爭進羨餘矣北珠出於女

真子美市於遼遼嗜其利虐女真捕海東青以求珠女

真深怨之而子美用是顯 二月己未詔令道士序位

在僧上女冠在尼上 壬戌向宗回徙封安康郡王

甲子詔淮南兩浙應私鑄錢限一季首納限滿不首竝依私錢法其納到私錢竝許發赴京畿錢監改鑄御書當十錢 以黎洞納土曲赦廣西 乙亥復醫學 巳

卯復行方田 丙戌以平昌郡君韋氏為才人 鳳翔

府于仙姑授清真沖妙先生尋遣李瓌齋御封香往鳳

翔太平宮等處道場因就宣于仙姑赴闕 此據長編又所載初草

有虞仙姑者年八十餘狀貌如少艾行大洞法一日帝

誦大洞經舉首見有仙官侍立者蔡京嘗具飯招仙姑見大猫指而問京曰識之否此章惇也意以諷京京大不樂帝嘗問仙姑致太平之期對曰當用賢人帝曰賢人謂誰曰范純粹也帝以語京京曰此元祐臣僚所使遂逐之於是士大夫爭言虞仙姑亦入元祐黨矣

此據長編

所載孫覲供到蔡京事迹

三月己丑幸金明池賜宰相蔡京等宴

丁酉尚書右僕射趙挺之罷為佑神觀使 以何執

中為門下侍郎鄧洵武為中書侍郎梁子美為尚書左

丞吏部尚書朱諤為尚書右丞諤出蔡京門善附會故
有是命 以蔡攸為龍圖閣學士兼侍讀 甲辰詔以
八行取士善父母為孝善兄弟為悌善內親為睦善外
親為婣信於朋友為任仁於州里為恤知君臣之義為
忠達義利之分為和孝弟忠和為上睦婣為中任恤為
下又制為不忠不孝不悌不和不睦不婣不任不恤之
刑諸犯八刑者縣令佐州知通以其事自書於籍報學
應有入學不睦十年不婣八年不任五年不恤三年能

改過自新不犯罪而有二行之實耆隣保伍申縣縣令
佐審聽入學在學一年又不犯第三等罪聽齒於諸生
之列 癸丑觀文殿大學士佑神觀使趙挺之卒贈司
徒諡清憲 以葉夢得為起居郎夢得附蔡京得為祠

部員外郎京罷相趙挺之更其所行及京再相復反前
政夢得入對因曰陛下前日所建立者出於陛下乎出
於大臣乎豈可以大臣進退而有所更張也帝悅故有
是命 夏四月乙丑以淑妃王氏為貴妃 五月己丑

朝散郎吳儲承議郎吳侔坐與妖人張懷素謀反伏誅
懷素獄起蔡京欲因以傳致呂惠卿之罪下其子淵于
獄榜笞數千下欲令招伏與懷素謀反淵卒不服得免
是日惠卿責授祁州團練副使宣州安置坐上表自劾
黨庇其子無責已之詞也 庚寅中書侍郎鄧洵武罷
張懷素獄朝士多株連者而洵武妻吳氏侔之兄女也
坐出知隨州提舉明道宮 甲午詔班新樂于天下
癸卯詔自今凡總一路及監司之任勿以元祐學術及

異議人充選 以安化蠻犯邊益兵赴廣西討之 乙

巳皇子構生才人韋氏所產也 六月巳未以梁子美

為中書侍郎 壬戌詔景靈宮建僖祖殿室 甲子以

黎人地為庭孚二州 庚午令諸州學以御製八行八

刑刻石從江東轉運副使家彬奏請也 癸酉賜上舍

生二十九人及第 乙亥尚書右丞朱諤卒贈光祿大

夫諡忠靖蔡京為誌其墓 甲申以才人韋氏為婕妤

是月以蔡疑為給事中疑以學錄試策揣蔡京且復

用即對曰熙豐之德業足以配天不幸繼之以元祐紹
聖之續述足以永賴不幸繼之以靖國陛下兩下求賢
之詔冀以聞至言收實用也而見於元符之末者方且
幸時變而肆姦言乘間隙而投異意詆誣先烈不以為
疑動搖國是不以為憚願逆處於未至而絕其原於是
擢為第一以所對頒天下甫解褐即除秘書正字不踰
年至侍從前此未有也 秋七月乙酉朔伊洛溢 戊
子詔括天下漏丁 壬寅班祭服于州郡 乙巳賢妃

武氏薨 丙午臣僚上言蘇州錢法之壞始於蔡渭成
於蹇序辰二人之罪惟均而小平錢之害又出序辰渭
已除名勒停送蔡州羈管而序辰止降三官安居善郡
罪同罰異士論咸疑詔蹇序辰責授單州團練副使江
州安置 崇寧更錢法以一當十民嗜利犯法者紛紛
或捕得私錢數大缶誣為樞密章案子紵所鑄紵劉達
之婦兄也蔡京怨達因而興獄初遣監察御史張茂直
就平江鞠之案上紵不伏再遣侍御史沈疇疇既至繫

者數百人盡釋之歎曰為天子耳目司而可傳會權要
殺人以苟富貴乎遂閱實平反以聞京大怒別遣官鍛

鍊綆竟竄海島籍沒其家

此據方勺泊宅編增修

於是臣僚上言

畸為耳目之官不能盡公寃實奏牘語言自為同異無
以副朝廷任使之意又言畸去春嘗上封事訾毀朝廷
法度意在迎合大臣懷奸異議詔貶畸監信州酒稅未
幾卒 八月乙卯太中大夫提舉崇福宮曾布卒于潤

州 丁巳封皇子構為蜀國公 庚申以戶部尚書徐

處仁為尚書右丞兵部尚書林摠同知樞密院事張懷
素妖事覺摠以開封尹與中丞余深雜治得士民交關
書疏數百摠請悉焚蕩以安反側衆稱為長者不知蔡
京與懷素游最密摠實為京地也京深德之用鞠獄明
允連擢數官至是遂登樞府 己巳降德音于淮海吳
楚二十六州減囚罪一等流以下釋之 九月庚寅建
顯烈觀于陳橋 己酉加上僖祖諡曰立道肇基積德
起功懿文憲武睿和至孝皇帝朝獻景靈宮 庚戌饗

太廟 辛亥饗明堂赦天下升永興軍為大都督府

李景直等四人以上書觀望罪竝編管嶺南 宣義郎

致仕程頤卒年七十五頤於書無所不讀其學本於誠
以大學論語孟子中庸為標指而達於六經動止語默
一以聖人為師嘗言今農夫祁寒暑雨深耕易耨播種
五穀吾得而食之百工技藝作為器物吾得而用之介
冑之士被堅執銳以守土宇吾得而安之無功澤及人
而浪度歲月晏然為天地間一蠹唯綴緝聖人遺書庶

幾有補耳於是著易春秋傳平生誨人不倦故學者出其門最多淵源所漸皆為名士而劉絢李籲謝良佐游酢張繹蘇昞呂大臨呂大鈞尹焞楊時德望尤著世稱願為伊川先生 冬十月己未詔士有才武絕倫者歲貢準文士上舍上等法 庚申和賜蔡京君臣慶會閣落成詩 辛酉蘇州地震 乙丑提舉崇福宮張商英責授安化軍節度副使歸州安置以臣僚言其罪大責輕也 己巳大雨雹 閏月丙戌以林攄為尚書左丞

資政殿學士鄭居中同知樞密院事初居中自言為鄭貴妃從兄弟妃家世微亦倚居中為重由是連擢至翰林學士除同知樞密院事時妃寵冠後宮於居中無所賴乃用宦官黃經臣策以外戚秉政辭改資政殿學士中太一宮使兼侍讀蔡京再得政居中之助為多厚責報於京京為言樞密本兵之地與三省殊無嫌於用親經臣方持權力抗前說京言不效居中疑不已援始怨之乃與張康國間京都水使者趙霆得龜兩首於黃河

獻以為瑞京曰此齊小白所謂象罔見之而霸者也居
中曰首豈宜有二人皆駭異而京獨主之殆不可測帝
命秉龜金明池謂居中愛我遂申前命 乙未詔守令
以戶口為殿最 升桂州為大都督府建鎮州於黎母
山心賜軍額曰靖海用知桂州王祖道策也 壬申禁
用翡翠 乙巳升太原府鄧州並為大都督府 十一
月壬子朔日有食之蔡京以不及所當食分率羣臣稱
賀 癸亥詔以議禮當追述三代之意適今之宜開元

禮不足為法今親製冠禮沿革十一卷付議禮局餘五
禮令視此編次 乙丑置內外符寶郎國初創業艱難

諸寶多階石為之元豐中詔依古作天子皇帝六璽有
玉而未成元符初始得玉工之善者琢之但疊篆而已
玉亦不甚良至是得漢傳國璽寶秦璽乃藍田玉李斯
之魚蟲篆也文曰受命於天既壽永昌帝獨取其文而
黜其璽不用因自作受命寶其方四寸有奇時又得古
小玉印文曰承天福延萬億永無極者帝又以其文倣

李斯魚蟲作寶大將五寸皆為螭紐其篆則蔡京命其子儵以意毀之名為鎮國受命二寶合先帝六璽是為

八寶

此據蔡條國史後補修入

命置官以掌之尚書省言今禁中已

有常用之寶所用至多不可改移欲鎮國受命寶皆寶而不用惟封禪則用之皇帝之寶答鄰國書則用之皇帝行寶降御劄則用之皇帝信寶賜鄰國書及物則用之天子之寶答夷國書則用之天子行寶封冊則用之天子信寶舉大兵則用之餘皆用常用之寶從之已

已升瀛州為河間府瀛海軍節度 戊寅尚書右丞徐處仁以母憂去位 南丹州地與宜州及西南夷接壤世為莫氏所居自署刺史王祖道欲取之乃誣其酋莫公佞阻東蘭州不令納土發兵討之擒公佞以南丹州為觀州公佞弟公晟結溪峒報復侵掠城邑殺刺史蔡京匿不以聞特置黔南路領庭孚平允從宜柳融觀九州 十二月庚寅京以功加太尉進何執中以下官二等而召祖道為刑部尚書祖道在桂四年厚以官爵金

帛挑諸夷建城邑調兵鎮戍輦輸內地錢布鹽粟無復
齊限地瘡痍戍者十亡五六實無尺土一民益於縣官
時廣西轉運副使張莊與祖道表裏遂以代其任祖道
莊既鑿空超取顯美由是龐恭孫趙適程鄰相與效之
邊壤益多故矣 癸巳以江寧荆南杭越洪福潭廣桂
竝為帥府 丁酉置開封府府學 己亥以婉容喬氏
為賢妃 是歲秦鳳旱京東水河溢遣官賑濟貸被水
戶租 廬州雨豆 乾寧軍言黃河清踰八百里凡七

晝夜詔以乾寧軍為清州 涪州夷駱世葉等內附以
其地為珍承二州知州龐恭孫誘之以來也 太廟齋
郎方軫上書言蔡京睥睨社稷內懷不道專以紹述之
說為自媒之計內而執政侍從外而帥臣監司無非其
門人親戚京每有奏請盡作御筆行出語人曰此上意
也明日不行又語人曰京實啓之也善則稱已過則稱
君必欲陛下歛天下之怨而後已自元符末陛下嗣服
忠義之士投匭者無日無之京分為邪等黥配編置木

蓋仕籍則誰肯為陛下言哉京又使子攸日以花石禽鳥為獻使陛下不知天下治亂臣以為京必反也請誅京以安天下詔宣示京京請下軫獄竟流嶺南

二年正月壬子朔受八寶於大慶殿大赦天下文武進位一等蔡京表賀符瑞 乙卯以婉儀劉氏為德妃

己未太尉蔡京進太師加童貫節度使仍宣撫 庚申

進封京兆郡王桓為定王蜀國公構為廣平郡王 甲

子以神宗德妃宋氏劉氏為淑妃賢妃喬氏為德妃

戊寅徙封向宗回為漢東郡王向宗良為開府儀同三司改封趙懷德為順義郡王昭化軍節度使河南蕃部總領以河南蕃將綿實羅蒙為節度觀察留後賜名趙懷忠河東河北盜起二月甲申置諸路曹掾官丙戌歸州安置張商英移陝州居住甲午詔建徽猷閣藏哲宗御集置學士直學士待制官庚戌以媿好韋氏為修容三月庚申班金籙靈寶道場儀範于天下戊寅賜上舍生十三人及第門下中書後省

左右司言檢會今年正月一日赦書元祐黨人懷姦
睥睨報怨不已公肆詆誣罪在宗廟者朕不敢貸其
或情輕法重例被放棄或非身自犯罪因人得罪或志
匪誣謗言有近似或本緣辦理語涉譏訕或止因職
事偶涉更改凡此之類不據元貶謫罪犯審量其情
分輕重等第取情理輕者與落罪籍甄叙差遣今將
元編類冊內依詳赦文看詳到孫固等四十五人

孫固

陸佃王存蔣之奇趙瞻安燾顧臨張問朱師服錢勰王
欽臣楊畏李之純王汾馬默周鼎尚級李昭玘歐陽棐

陳察梁士能楊彥璋李賁鍾正甫許端卿趙彥若賈易
姚勔呂希績歐陽中立葉伸陳郭朱光喬蘇嘉吳侍常
正李茂直司馬康都貺鄧忠臣廖
詔除孫固安燾賈易

外餘竝出籍又看詳到葉祖洽等六人

葉祖洽郭知章
上官均朱紱種

師極錢
景祥

詔竝出籍

考異李燾曰初草王珪孫固出籍在
四月十三日今不取實錄竝不載黨

人出籍事
甚無謂也

詔監司歲舉所部郡守二人縣令四人赴

三省審察

夏四月辛巳手詔以追述先王寓馬於農

之意募人給地免租牧馬行之期年熙河頗見就緒凡
縣鎮塞關堡官衙內竝帶管勾給地牧馬事佐官同管

勾庶使人人各知任責 甲辰童貫遣統制官辛叔獻

馮瓘等復洮州 五月庚戌朔日有食之 辛亥以復

洮州功賜蔡京玉帶初神宗用唐故事以玉帶賜王安

石止繫三日及京受賜遂為常服 庚戌提舉京西南

路學事路瑗言臣所領八州三十餘縣比諸路最為褊

小學舍乃至三十餘區教養生徒三千三百餘人贍學

田業等歲收錢斛六萬三千餘貫石竊計諸路學舍生

徒田業錢斛之數何翅數百萬此曠古所未嘗有也乞

詔有司總會諸路州軍縣文武大小學生并學費所入所用實數具圖冊上之御府副在辟廡仍宣付史館從之壬子錫爾格城王子藏珍布格降復積石軍藏珍布格以咒詛扇蕃族居錫爾格空城邊吏謂既能動衆必為邊患童貫欲實其事遂會諸路進兵仍遣知西寧州劉仲武出奇趨錫爾格城藏珍布格迎降并女弱才二十八人初未嘗有兵也洎就擒邊吏張大其功過為緣飾以金紙糊桶為頭冠木椅為胡牀淺紅絹為織種種皆非羌

物捷聞蔡京率百官稱賀詔俘藏珍布格至京師授正任

團練使鄧州鈐轄尋死于鄧州

此據長編所載
青唐錄修入

甲寅

復諸路歲貢供奉物 丁巳以童貫為檢校司空奉寧

軍節度使賞收洮州積石功也 初童貫議欲收積石

軍積石與西寧接境劉仲武詣貫計事曰大兵入境賊

窮必走夏國路由西寧當即掩捕欲降則招納之或深

入巢穴可乘其便但河橋功力未易辦若稟命待報慮

失事機貫許以便宜藏珍布格果欲降丐一子為質仲

武即遣子錫往而河橋已成仲武以兵渡河挈與歸獻
捷宣撫司貫掩其功止錄河橋之勞仲武終不自言後
帝遣使持金醖賜先得積石軍招納降王者使者訪其
實以醖授仲武且召對帝慰勞久之曰高永年失律以
不用卿言今招納降王撫定河南皆卿力也仲武謝問
幾子曰九子乃以錫為右班殿直閤門祇候餘悉補三
班借職命仲武復知西寧州

此據長編所載
劉仲武傳修入

壬戌詔

臨洮城依舊為洮州

帝賜蔡京詔曰昔我神考肇開

武勝疆理西陲惟時臨洮雖未克復分置一道以總其
名丕顯聖謨益示必取朕克篤前烈告厥成功遠徹河
源奄有積石名王係頸版築一新壺漿載塗民罔告病
眷茲碩畫實賴相臣差次疇庸宜居第一蔡京可特許
奏補一子一孫官餘依轉官恩數 戊辰詔張康國以
下各進官一等 己卯以收復功命戶部侍郎洪中孚
奏告天地宗廟社稷 葆真觀妙沖和先生劉混康卒
特贈太中大夫 六月乙酉以涪夷地為珍州 甲午

以平夏城為懷德軍 乙未以殿中六尚算學太官局

翰林儀鸞司皆隸六察 戊戌門下中書後省左右司

復依赦看詳到韓維等九十五人詔竝出籍

韓維楊康國趙高鮮

于旒龔原董敦逸呂希純岑象求孔武仲某濤唐義問
余卞宋保國李深陳祐商倚李之儀范正平李祉韓治
曾紆黃隱馬諗王履任濬趙希德郭子旂劉延肇錢咸
吳休復崔昌符李遇李玩吉師雄趙希夷王庭臣高士
權李永王獻可李嘉亮姚雄潘滋高茂華滕友張溥梅
君俞楊瓌寶林膚彭醇呂彥祖陳唐曹盥王守曹興宗
高公應黃才江公望黃安期梁俊民王賈張集鹿敏求
李賁高士育逢純熙趙令時倪直孺沈千宋壽岳侯顧
道趙越周鈔蕭剏高遵裕劉渭楊琳鄧允中董祥王交
楊拙于肇劉勃許亮輔謝潛張夙何大正張裕洪芻鮮

欽定四庫全書

治通鑑
卷九十七

十一

于緝李積中馮百藥家公通季新許安修按
此據長編所列止九十四人蓋脫去一姓名

戊申三

省檢會正月一日赦書應元祐黨人不以存亡及在籍
可特與叙官勘會前任宰臣執政官見存人韓忠彥蘇
轍安燾身亡人文彥博呂公著呂大防劉摯曾布章惇
梁燾王巖叟李清臣范純禮黃履詔見存人與復一官
文彥博等亦各追復有差 秋七月庚戌罷建僖祖殿
室 乙卯以婉容王氏為賢妃 八月辛巳邢州河水
溢壞民廬舍復被水者家 丙申中書侍郎梁子美罷

知鄆州 巳亥置保州敦宗院 九月辛亥以林攄為

中書侍郎吏部尚書余深為尚書左丞 壬戌貶向宗

回為太子少保致仕 乙丑詔諸路州學有閣藏書皆

以經史為名方今崇八行以迪多士尊六經以黜百家

史何足言應置閣處賜名曰稽古 考異宋史歲宗紀大觀三年九月巳未賜

天下州學藏書閣名稽古今從長編 癸酉皇后王氏崩 削向宗回官

爵 丙子曲赦熙河蘭湟秦鳳永興軍路 冬十一月

丁未朔太白晝見 乙丑上大行皇后諡曰靖和 丙

寅呂惠卿復宣奉大夫提舉明道宮任便居住 戊辰

詔受命寶增鎮國二字 十二月己卯峽州居住張商

英許任便居住商英有別業在宜都縣懇蔡京乞歸其
地京從都省批狀依所申商英深德之 壬寅陪葬靖

和皇后于永裕陵 是歲同州黃河清 夏人入貢

涪州夷任應舉湖南徭楊再光內附 知桂州張莊奏

安化上三州一鎮諸蠻納土共五萬餘戶二十六萬餘

人幅員九千餘里又奏寬樂州安沙州譚州四州七原

等州納土計二萬人一十六州三十三縣五十餘峒幅
員萬里蔡京率百官表賀謂混中原風氣之殊當天下
輿地之半進莊兼黔南經略安撫使 渝州蠻趙泰等
內附以其地為秦州 詔孔伋從祀孔子廟庭 秦州
觀察使知府州折克行卒贈武安軍節度使以其子可
大為榮州團練使知府州克行沉勇有力善撫士卒在
邊三十年戰功最多虜畏其威名號折家父

三年春正月乙卯祔靖和皇后神主於別廟 丁卯以

涪夷地為承州

甲戌升湟州為饗德軍節度

二月

丙子朔播州楊文貴納土以其地置遵義軍

丁丑提

舉崇福宮儀國公韓忠彥以宣奉大夫致仕

庚子臣

僚上言知和州胡師文昨為發運使獨銜建議將當二

銅錢改鑄當十自古積山之利以銅鑄錢不聞以錢鑄

錢當二錢法與小平錢輕重相等故私鑄不禁而自止

民間便之此神宗之良法也師文諂奉大臣妄亂變更

將已行當二錢毀而改鑄識者痛心詔師文提舉萬壽

觀 三月丙午立海商越界法 辛酉詔四川郡守竝

選內地人任之 壬戌併黔南入廣西路 乙丑賜禮

部奏名進士及第出身六百八十五人 壬申知樞密

院事張康國卒康國始因附蔡京而進及在樞府寢為

崖異時帝惡京專愎陰令康國沮其姦且許以相京忌

康國遂引吳執中為中丞執中即劾京客劉昺宋喬年

帝嘉執中之不阿康國曰是乃為逐臣地耳已而執中

將論康國康國先知之旦奏事留白帝曰執中今日入

對必為京論臣臣願避位既而執中對果陳其事帝怒
黜執中知滁州至是康國因退朝趨殿廬暴得疾仰天
吐舌昇至待漏院死或疑中毒云 時童貫權益張與
黃經臣胥用事中王廬航表裏為姦搢紳側目右正言
陳禾曰此國家安危之本也吾任言責此而不言可乎
遂上疏劾貫經臣怙寵弄權之罪願亟竄之遠方論奏
未終帝拂衣起禾引帝衣請畢其說衣裾落帝曰正言
碎朕衣矣禾言陛下不惜碎衣臣豈惜碎首以報陛下

此曹今日受富貴之利陛下他日受危亡之禍言愈切
帝變色曰卿能如此朕復何憂內侍請帝易衣帝却之
曰留以旌直臣翌日貫等相率前訴謂國家極治安得
此不祥語盧航奏禾狂妄謫監信州酒稅夏四月戊寅
中書侍郎林攄罷集英牘唱貢士攄當傳姓名不識甄
益字帝笑曰卿誤耶攄不謝而語詆同列御史論其寡
學倨傲不恭失人臣禮黜知滁州猶為帝言頃使遼見
其國中攜貳若兼而有之勢無不可蓋欲報其辱也帝

由是始有北伐之意 戊子以淑妃劉氏為貴妃 癸

巳以鄭居中知樞密院事吏部尚書管師仁同知樞密

院事 癸卯以余深為中書侍郎兵部尚書薛昂為尚

書左丞工部尚書劉正夫為尚書右丞昂與余深林摠

附蔡京為至久至舉家為京避私諱或誤及之輒加笞

責昂嘗誤及即自批其口 五月乙巳朔孟翊獻所畫

卦象謂宋將中微宜更年號改官名變庶事以厭之帝

不樂詔竄之遠方 丙辰令辟雍宴用雅樂 丁巳慮

四 戊辰大雨雹 辛未以德妃喬氏為貴妃 六月

甲戌朔詔修樂書 同知樞密院事管師仁以疾罷為

佑神觀使尋卒 丁丑尚書左僕射蔡京罷中丞石公

弼侍御史張克公劾京罪惡章數十上乃以京為中太

一宮使請給恩數竝依見任宰相例制略曰明哲保身

雖弗居於寵利忠嘉告后當無廢於燕閒尚懋遠圖以

膺多福公弼始與京有連故得進用及居言路遇事利

害輒言不憚京始忌之既免京政復上章言吏員猥冗

庚元豐舊制於是詔堂選歸吏部者數千員罷宮廟者
千員都水知埽六十員縣非大郡悉省丞在京茶事歸
之戶部諸道市舶歸之轉運司仕途頓清 辛巳以何
執中為特進尚書左僕射兼門下侍郎 瀘州夷王募
弱內附以其地置純滋二州 庚寅冀州河水溢 何
執中一意謹事蔡京遂代為首相太學生陳朝老詣闕
上書曰陛下知蔡京之姦解其相印天下之人鼓舞有
若更生及相執中中外黯然失望執中雖不敢肆為非

法若蔡京之蠹國害民然碌碌常質初無過人天下敗壞至此如人一身臟腑受疹已深豈庸庸之醫所能起乎執中夤緣攀附致位二府亦已大幸遽俾之經體贊元是猶以蚊負山多見其不勝任也疏奏不省 秋七月丁未詔謫籍人除元祐姦黨及得罪宗廟外餘並錄用 甲寅復張商英為通議大夫提舉玉局觀 八月己丑嗣濮王宗漢卒兄子仲增嗣 丙申升融州為清遠軍節度 己亥宣奉大夫致仕儀國公韓忠彥卒

冬十月癸丑減六尚局供奉物 十一月丁未詔算學

以黃帝為先師風后等八人配饗巫咸等七十八從祀

己巳蔡京進封楚國公致仕仍提舉編修哲宗實錄

朝朔望長子提舉醴泉觀攸除樞密直學士次子宣義

郎儵除直秘閣 十二月辛卯呂惠卿復資政殿學士

戊子以張商英為龍圖閣學士知杭州 己亥罷東南

鑄夾錫錢 中丞石公弼言蔡京盤旋京師餘威震於

羣臣願持必斷之決以消後悔侍御史洪彥昇言京朋

姦誤國公私困弊既已上印而偃蹇都城上憑眷顧之恩中懷跋扈之志願早賜英斷遣之出京 侍御史毛注言孟翊妖姦以天文惑衆嘗獻蔡京詩言涉不順京輒喜而受之因以獻易書而賜官卒致詆誣以冒重辟而京不復愧恥張懷素惡逆以地理惑衆京熟與之遊從京妻葬地下日懷素主之嘗同遊淮左題字刻石後雖陰令人追毀以掩其迹而衆所共知以至尚書省事多不取旨直行批下以作陛下之威重祿厚賞下結人

心以作陛下之福林攄跋扈之黨而置之政本之地宋
喬年姦雄之親而置之尹京之任考之以心揆之以事
其志有不可量者今竝盤旋輦轂久而不去其情狀已
可見矣太學生陳朝老復疏京惡十四事乞投畀遠方
以禦魑魅皆不報 是歲江淮荆浙福建旱秦鳳階成
飢發粟賑之蠲其賦 陝州同州黃河清

四年春正月庚子朔中丞吳執中言竊聞邇來諸路以
八行貢者如親病割股或對佛燃頂或刺臂出血寫青

詞以禱或不如葷常誦佛書以此謂之孝或嘗救其兄之溺或與其弟同居十餘年以此謂之悌其女適人貧不能自給取而養之於家為善內親又以壻窮窶收而教之為善外親此則人之常情仍以一事分為睦嫻二行嘗一遇歉歲率豪民以粥食飢者而謂之恤夫粥食飢者乃豪民自為之而已獨謂之恤可乎又有嘗收養一遺棄小兒嘗救一跛者之溺而以為恤如此之類不可遽數伏願下之太學俾長貳博士考以道藝別白是

非澄去冒濫勿使妄進申飭郡縣長吏及學事司察驗
行實有其人則舉無其人勿以妄貢務在奉承詔旨不
失法意從之 癸卯詔新置河東河北陝西諸監罷改

鑄當十錢 辛酉詔士庶拜僧者論以大不恭 丁卯

夏人入貢 呂惠卿降授正奉大夫侍御史毛注劾惠

卿上表謝復官用詩風雨及青蠅節南山章句以古君
子自處而以亂世方盛時罪不可赦故有是命 二月

庚午朔禁然頂煉臂刺血斷指 辛未以張商英為資

政殿學士中太一宮使初商英起知杭州過闕入對言
神宗修建法度務以去害興利而已今誠一一舉行則
盡紹述之美法若有弊不可不變但不失其意足矣

戊寅議禮局奏修成大觀禮書二百三十一卷祭服制
度十六卷祭服圖一冊據經稽古酌今之宜以正沿襲
之誤又別為看詳十二卷祭服看詳二冊詔行之 庚

辰罷京西錢監 甲申詔自今以賞進秩者毋過中奉

大夫 己丑以余深為門下侍郎資政殿學士張商英

為中書侍郎戶部尚書侯蒙同知樞密院事帝嘗從容
問蒙曰蔡京何如人也蒙對曰使京正其心術雖古賢
相何以加京聞而銜之 壬辰罷河東河北京東鑄夾
錫鐵錢 癸巳詔方田之法均賦惠民訪聞近歲以來
有司推行怠惰監司督察不嚴賄賂公行高下失實可
嚴飭所部仍仰監司覺察 三月庚子募飢民補禁卒
詔醫學生併入太醫局算入太史局書入翰林書藝
局畫入翰林畫圖局其學官等並罷 甲寅敕所在賑

恤流民 癸亥詔罪廢人稍加甄叙能安分守者不俟
滿歲各與叙進以責來效 丙寅賜上舍生十五人及
第 戊辰詔上書邪下等人可依無過人例今後改官
升任並免檢舉 夏四月己卯班樂尺於天下 癸未
蔡京上所修哲宗實錄 丙申立感生帝壇 丁酉詔
修哲宗正史 五月壬寅停僧牒三年 丁未彗出奎
婁 甲寅立詞學兼茂科帝以宏詞科不足以致文學
之士改立此科歲附貢士院試去檄書而增制誥中格

則授館職歲不過五人 丙辰詔以彗見避殿減膳令

侍從官直言指陳闕失 戊午赦天下 壬戌改廣西

黔南路為廣南西路 癸亥治廣西妄言拓地罪追貶

帥臣王祖道為昭信軍節度副使放張莊于永州 先

是御史張克公論奏蔡京頃居相位擅作威福權震中

外輕錫予以蠹國用託爵祿以市私恩謂財利為有餘

積皆出誕謾務誇大以興事功肆為騷擾援引小人以

為朋黨假借姻婭布滿要途以至交通豪民興置產業

役天子之將作營葺居第用縣官之人夫漕運花石曾
無尊主庇民之心惟事豐已營私之計若是之類其事
非一至若名為祝聖壽而修塔以壯臨平之山勢託言
灌民田而決水以符興化之讖辭致姪俟之告變而謬
為心疾受孟翊之誣言而與之官爵趙真欲輔之以妖
術張大成竊伺其姦意駭動遠邇聞者寒心皆足以鼓
惑天下為害之大者也 甲子詔蔡京特降授太子少
保依舊致仕在外任便居住制略曰輕爵祿以市私恩

濫錫予以蠹邦用借助姻婭密布要途聚引克邪合成
死黨以至假利民而決興化之水託祝聖而飾臨平之
山豈曰懷忠殆將邀福屢有告陳之迹每連狂悖之嫌
雖僅止於印章猶久留於里第偃蹇弗避傲睨罔悛致
帝意之未孚昭星文而申譴言章繼上公議靡容固欲
用恩難以屈法宜禡師臣之扶俾參宮保之官聊慰羣
情尚為寬典 丙寅門下侍郎余深罷深與蔡京結為
死黨京既去國深不自安上疏乞罷乃出知青州 六

月庚午御殿復膳

乙亥以張商英為尚書右僕射兼

中書侍郎蔡京久盜國柄中外怨疾見商英能立異同
更稱為賢帝因人望而相之時久旱彗星中天商英受
命是夕彗不見明日雨帝喜因大書商霖二字以賜之

壬辰復向宗回為漢東郡王

乙未慮囚 丙申門

下侍郎薛昂罷為佑神觀使

秋七月辛丑詔權罷方

田 己未張商英言當十錢自唐以來為害甚明行之
於今尤見窒礙益小平錢出門有限有禁故四方商旅

物貨交易得錢者必入中求鹽鈔收買官告度牒而餘錢又流布在街市故官私内外交相利養自當十錢行一夫負八十千小車載四百千錢既為輕齎之物則告牒難售鹽鈔非操虛錢而得實價則難行重輕之勢然也今欲權於內庫并密院諸司借支應干封樁金銀物帛并鹽鐵等下令以當十錢盜鑄偽濫害法半年更不行用令民間盡所有於所在州軍送納每十貫官支金銀物帛四貫文擇其偽鑄者送近便改鑄小平錢存其

如樣者俟納錢足十貫作三貫文各撥還元借處然後
京城作舊錢禁施行乃可議權貨通商鈔法 八月庚
午張商英又言陛下奮發英斷慨然欲救錢輕物重之
弊一旦發德音下明詔捐棄帑藏數千萬緡錢寶改當
十為當三令下之日中外歡呼萬口一舌然而姦邪之
在內者密倡其說曰不久必復可畜以待也姦邪之在
外者曉民以掠美曰當三則虧汝當七則折中矣是以
小民聽而和之令出五十日而猶未大孚也伏望陛下


固志不移使正議卒行姦邪愧服而漸消其凶悍不平之氣 乙亥以劉正夫為中書侍郎侯蒙為尚書左丞翰林學士承旨鄧洵仁為尚書右丞 戊寅省内外冗官 庚辰以資政殿學士吳居厚為門下侍郎 丁亥行内外學官選試法 閏月辛丑詔諸路事有不便於民者監司條奏之 辛酉詔戒朋黨 以張閣知杭州閣思所以固寵乃因辭日乞領花石綱事自此應奉益繁矣 九月丙寅朔日有食之 冬十月丁酉立貴妃

鄭氏為皇后后開封人本欽聖殿押班初帝為端王常
朝欽聖太后太后命后供侍及帝即位遂以賜帝后性
端謹善順承帝意好觀書章奏能自製帝愛其才竟立
為后 蔡京之免知樞密院事鄭居中自許必得相帝
覺之不果用至是復以外戚罷 戊戌以吳居厚知樞
密院事太白晝見 十一月丁卯祀園丘大赦改明年
元曰政和 丙戌罷拱州為襄邑縣 戊寅詔通州安
置人陳瓘與自便初瓘自合浦放還居四明而其子正

彙幹至餘杭適聞蔡崇盛說蔡京有動搖東宮之語正
彙即日自陳於杭帥蔡疑疑時方結京為死黨遂執正
彙送京師而飛書告京俾預為計事下開封制獄知開
封李孝稱酷吏也乃并下明州捕瓘士民哭送之瓘不
為動既就獄顧其子笑曰不肖子煩吾一行孝稱脅瓘
使證正彙之妄瓘曰正彙聞京將不利於社稷傳於道
路遽自陳告瓘以所不知忘父子之恩而指其為妄則
情所不忍挾私情以符合其說又義所不為况不欺不

貳平昔所以事君教子宜於利害之際有所貪畏自違
其言乎蔡京姦邪必為國禍瓘固嘗論於諫省亦不待
今日語言間也時內侍黃經臣監勘聞所對失聲歎息
謂瓘曰主上正欲知實狀右司第依此置對獄具竟坐
正彙以所言過實流竄海島而瓘亦有通州安置之命
是年三月事也至是方許其自便 十二月庚戌改諡
靖和皇后為惠恭 以呂惠卿為觀文殿學士知大名
府 是歲夔州江水溢海水清 出宮女四百八十六

人 南丹州首領莫公晟內附



資治通鑑後編卷九十七

欽定四庫全書

史部

資治通鑑後編卷九十八

九

詳校官檢討_臣德生

編修_臣裴謙覆勘

總校官進士_臣朱鈐

校對官中書_臣王學海

謄錄監生_臣崔酉芳

欽定四庫全書

資治通鑑後編卷九十八

刑部尚書徐乾學撰

宋紀九十八

起重光二年閏三月盡閏
逢敦牂并二月凡四年

徽宗體神合道駿烈遜功聖文仁德憲慈顯孝皇

帝

政和元年春正月己巳以賢妃王氏為德妃 辛未詔

諸路州軍學生不及八十人處不置教授若熙豐曾置

教授者雖人少自合存留 壬申毀京師淫祠一千三

十八區 丙戌廢白糞二州 壬辰詔百官厲名節

陳瓘嘗謂紹聖史官專據王安石日錄改修神宗史變

亂是非不可傳信乃作尊堯集深明誣妄以正君臣之

義是月張商英奏請下明州取其書送編修政典局

二月壬寅冊皇后 乙巳詔陝西河東復鑄夾錫錢

丙午以太子少師鄭紳為開府儀同三司 三月癸亥

朔御製御書政和新修五禮序議禮局請刻石于太常

寺許之 以知大名府呂惠卿為醴泉觀使 己巳詔

監司督州縣長吏勸民增植桑柘課其多寡為賞罰

癸酉以吏部尚書王襄同知樞密院事 夏四月乙卯

罷陝西河東鑄夾錫錢 丙辰慮四 立守令勸農黜

陟法 五月癸亥詔四川羨餘錢物歸左藏庫 戊辰

詔見在當十錢竝作當三行使以為定制 己卯東南

有星晝隕 丁亥解池生紅鹽 是月再下通州取陳

瓘尊堯集送編修政典局 六月甲寅復蔡京為太子

少師 秋七月癸未廢平從二州為砦 戊子醴泉觀
使呂惠卿守本官致仕 八月乙未復蔡京為太子太
師 丁巳尚書右僕射張商英罷中丞張克公論給事
中劉嗣明以繳駁事降官商英理屈故也商英為政持
平謂蔡京雖明紹述但借以劫制人主禁錮士大夫耳
於是大革弊事改京所鑄當十大錢為當三以平泉貨
復轉般倉以罷直達行鹽鈔法以通商旅蠲橫歛以寬
民力勸帝節華侈息土木抑僥倖帝頗嚴憚之嘗葺升

平樓戒主者遇丞相導騎至必匿匠樓下過則如初時
稱商英忠直然意廣才踈凡所當為先於公座誦言故
不便者得預為計初何執中與蔡京同相凡營立皆預
議至是惡商英出已上與鄭居中日夜醢織其短先使
言者論其門下客唐庚竄之惠州又帝在潛邸方伎郭
天信言當履天位及踐阼頗睠寵之商英因與往來事
覺帝不悅居中乃諷克公以嗣明事論之遂罷政出知
河南 戊午詔監司部內官吏一歲中有犯罪至三人

以上雖不及三人而或有嘗薦舉者罪及監司 戊寅

同知樞密院事王襄罷 九月辛酉詔知河南府張商

英落觀文殿大學士改知鄧州壬申復降授太中大夫

仍知鄧州校書郎李士觀辟雍博士尹天民竝送吏部

與合入差遣以劉嗣明奏商英擅便降敕令天民士觀

編類御前文字也 辛巳詔陳瓘自撰尊堯集語言無

緒竝係詆誣合行毀棄仍勒停送台州羈管令本州當

職者常切覺察不得放出州城月具存在申尚書省於

是行移峻急所過州縣皆以兵甲防送不得稽留至台
久之人莫敢以居屋借賃者暫館僧舍而郡守以十日
之法每令廂巡起遣十日輒移一寺數月後朝廷起遷
人石幟知州事且令赴闕之官幟既視事遣兵官約束
毋得出入又置邏卒前後巡察抄錄賓客書問之往還
者尋令兵官突入所居搜檢行李攝瓘至州庭大陳獄
具將脅以死瓘揣知其意大呼曰今日之事豈被旨耶
幟失措曰朝旨欲取尊堯集耳瓘曰君知尊堯所以立

名乎蓋以神考為堯而以主上為舜也助舜尊堯何謂
詆誣時相學術淺短為人所愚君所得幾何乃亦不畏
公議干犯名分乎憾慙屢揖瓘退終不能害瓘何執中
怒遂罷憾瓘由是得免 童貫既得志於西羌遂謂遼
亦可圖因請使遼以覘之乃以端明殿學士鄭允中充
賀生辰使而貫副之或言以宦者為上介國無人乎帝
曰契丹聞貫破羌故欲見之因使覘其國策之善者也
遂行 冬十月庚寅觀文殿學士光祿大夫致仕呂惠

卿卒贈開府儀同三司諡文敏惠卿負恩排王安石衆皆薄之雖章惇曾布蔡京當國咸畏惡其人不欲引入朝以是轉徙外服訖於死云 辛卯以用事之臣多險躁朋比下詔申儆 辛亥知鄧州張商英責授崇信軍節度副使衡州安置單州安置郭天信責授昭化軍節度行軍司馬移新州安置以開封獄成商英天信嘗令余負僧德洪彭几往來交結臣僚再論列故有是責十一月壬戌詔上書邪等及曾經入籍人並不許試學

官 丙子臣僚言邇英講經其音釋意義當竝以王安

石等所進經義為準從之 乙酉京畿提舉學事林震

乞自今應以八行延入縣學者竝依州學外舍生例給

食從之 十二月己酉詔臺諫以直道覈是非毋憚大

吏毋比近習 辛亥廢鎮州升瓊州為靖海軍 乙卯

臣僚言陳瓘尊堯集十卷大綱取目錄之事解釋成文

有論及王安石事臣雖不見其全文但瓘在建中靖國

間嘗以安石日歷為不然昨來大臣領政典局知瓘素

有異論欲助成非謀故下瓘家取索望特旨嚴賜禁約
不得傳習如有已曾傳錄之家竝乞立限繳納仍下瓘
家取索藁本一切焚毀詔依奏 燕人馬植本遼大族
仕至光祿卿行汙而內亂不齒於人童貫使遼道廬溝
植夜見其侍史自言有滅燕之策因得見貫貫與語大
奇之載與俱歸易姓名曰李良嗣薦諸朝植即獻策曰
女真恨遼人切骨而天祚荒淫失道本朝若自登萊涉
海結好女真與之相約攻遼其國可圖也議者謂祖宗

以來雖有此道以其地接諸蕃禁商賈舟船不得行百有餘年矣一旦啓之懼非中國之利不聽帝召植問之對曰遼國必亡陛下念舊民遭塗炭之苦復中國往昔之疆代天譴責以治伐亂王師一出必壺漿以迎萬一女真得志先發制人事不侔矣帝嘉納之賜姓趙氏以為秘書丞圖燕之議自此始

二年春正月甲子制上書邪等人竝不除監司 癸未詔釋教修設水陸及祈禳道場輒將道教神位相參者

僧尼以違制論主者知而不舉與同罪著為令 二月
戊子朔詔太子太師致仕蔡京兩居上宰輔政八年首
建紹述勤勞百為降職居外游歷歲時况元豐侍從被
遇神考者今則無幾而又累經恩霈理宜優異可特復
太師仍為楚國公賜第京師 丁酉遼主如春州幸混
同江釣魚界外生女真酋長在千里內者以故事皆來
朝遼遇頭魚宴酒半酣遼主臨軒命諸酋次第起舞獨
阿固達辭以不能論之再三終不從他日遼主密謂北

院樞密使蕭奉先曰前日之燕阿固達意氣雄豪顧視不常可託以邊事誅之否則必貽後患奉先曰麓人不知禮義無大過而殺之恐傷向化之心假有異志叢爾小國亦何能為遼主乃止阿固達之弟武奇邁尼雅滿呼沙等嘗從遼主獵能呼鹿刺虎遼主喜輒加官爵庚子以婉容崔氏為賢妃三月乙亥詔蔡京到闕朝見引對拜數特依元豐中文彥博例許依舊服玉帶遇六參日趣赴起居在大班退親王後入己卯賜禮部奏

名進士及第出身七百十三人 夏四月己丑詔縣令以十二事勸農於境內躬行阡陌程督勤惰 辛卯復行方田 日中有黑子乍二乍三如栗大 甲午燕蔡京等于太清樓帝親為之記京又上記備言宮室服玩之盛其略曰政和二年三月八日皇帝制詔臣京宥過省愆服官就第命四方館使童師敏齋詔召赴闕臣京頓首辭繼被御劄手詔十責以大義惶恐上道於是飲至于郊曲燕於垂拱殿被袂于西池寵頒恩渥念無以

稱上曰朕考周宣王之詩吉甫燕喜既多受祉來歸自
鎬我行永久飲御諸友炰鼈膾鯉其可不如古乎詔以
是月八日開後苑宴太清樓命內客省使臣賈詳等五
人總領其事 庚戌以何執中為司空 壬子許衡州
安置張商英自便蔡京言臣自去朝班言多可畏伏聞
前宰張商英訛毀尤甚蓋緣臣罪大德輜所以致此今
日特蒙恩貸召還闕庭而商英譴責遠方雖其所犯醜
惡而臣與之同遇先帝出入三朝薄有情契拳拳之私

敢以此請故有是命 五月己巳蔡京落致仕三日一
至都堂議事以尚書省令廳為治所仍押敕劄 知永
嘉縣虞防言朝廷昨行當十錢最富國便民之良法也
所貴推行之得其人而已前日異議之人務快一日之
私上欺天聽改為當三亦誤國之一也望特許興復以
便上下詔虞防除名勒停送循州編管 壬申蔡京言
門下省乃覆駁之地臣欲兼而冒處實有妨嫌委素官
制望許臣免書門下省文字從之舊制凡詔令皆中書

門下議而後命學士為之至熙寧間有內降手詔不由
中書門下共議蓋大臣有陰從中而為之者及蔡京專
政患言者議已乃作御筆密進而丐帝親書以降謂之
御筆手詔違者以違制坐之事無巨細皆託而行至有
不類帝札者羣下皆莫敢言自是貴戚近臣爭相請求至
使中人楊球代書號曰書楊云 臣僚上言以科舉廢
罷縣學歲升之法非便詔自今竝依大觀三年四月以
前指揮其後降指揮更不施行 己卯手詔賜蔡京曰

臨平置塔初因錢氏尊相名寺起於治平匪緣近年創
有增建蔡京忠貫金石志安社稷八年輔政一德不渝
羣邪醜正意在中傷肆為無根之談冀陷不測之禍比
從閱實灼見厚誣惟大臣立朝誼當自信而哲王圖任
何畏巧言顧予心之亶孚豈衆言之足慮肆加開諭毋
或介懷 六月己丑以資政殿學士余深為門下侍郎
乙卯白虹貫日 戶部尚書陳顯因對言再用蔡京
士民失望帝怒貶顯知越州顯不復仕歸隱四明 秋

七月壬申訪天下遺書

九月癸未更定官名蔡京率

意自用欲改制以繼元豐之政乃首更開封守臣為尹
牧由是府分六曹縣分六案內侍省職悉倣機廷之號
修六尚局建三衛郎遂詔太師太傅太保古三公之官
今為三師古無此稱合依三代以三公為真相之任司
徒司空周六卿之官太尉秦主兵之任皆非三公竝宜
罷仍立三孤為次相之任更侍中為左輔中書令為右
弼尚書左僕射為太宰兼門下侍郎右僕射為少宰兼

中書侍郎罷尚書令及文武勲官而以太尉冠武階然是時員既濫冗名且紊雜甚者黃冠道流亦濫朝品元豐之制至今大壞阿固達自混同江宴歸疑遼主知有異志遂稱兵先併旁近部族女真趙三阿固察拒之阿固達虜其家屬二人走訴咸州詳穩司送北院樞密使蕭奉先作常事以聞遼主仍送咸州詰責欲使自新後數召阿固達竟稱疾不至冬十月乙巳得玉圭於民間宣示羣臣蔡京何執中等議以為此即禹錫之元

主陛下繼禹之緒行堯之道格於上帝故天授以至寶
不勝大慶 已酉奏請行受寶之禮詔不允自是三上
表從之 十一月已未置知客省引進四方館東西上
閤門事 丁丑御筆言方田之法本以均稅有司奉行
違戾貨賂公行豪右形勢之家類蠲賦役而移於下戶
致使流徙常賦所入虧額至多殊失先帝厚民裕國之
意已降指揮權罷方量有訴訟賦役不均者且依未方
以前舊數其流徙人戶仰守令多方措置招誘歸業

戊寅日南至受元圭于大慶殿赦天下 辛巳蔡京進
封魯國公以何執中為少傅太宰兼門下侍郎執政皆
進秩 十二月乙酉以鄭居中為特進 丙戌以武信
軍節度使童貫為太尉 乙巳定命婦名為九等 丙
午宴輔臣于延福宮初蔡京欲以宮室媚帝召內侍童
貫楊戩賈詳何訢藍從熙諷以內中逼窄之狀貫等乃
請於大內北拱宸門外因延福舊名而新作之五人分
任工役視力所致爭以侈麗高廣相誇尚各為制度不

務沿襲及成號延福五位帝自為文以記之每歲冬至後即放燈自東華門以北竝不禁夜徙市民行鋪夾道以居縱博羣飲至上元後乃罷謂之先賞 癸丑始詔諸路給地牧馬又以諸路馬食儲積亦艱延邊土曠乘春發生青草茂盛諸城寨宜分蕃出牧就野飽青晚持草歸以充夜秣則官芻可省詔陝西諸路相度措置聞奏 是歲出宮女三百八十三人 高麗入貢 成都路夷人董舜咨董彥博內附置祺亨二州

三年春正月甲子以天錫元圭遣官冊告永裕永泰陵
癸酉追封王安石為舒王子雱為臨川伯配享文宣
王廟 丁丑吳居厚罷以鄭居中知樞密院事居厚久
居政府以周謹自媚雖無顯惡然一時聚斂者推為稱
首 庚辰詔議禮局新修五禮儀注宜以政和五禮新
儀為名 二月甲申以德妃王氏為淑妃 庚寅罷文
臣勲官 崇恩皇太后劉氏帝以哲宗故曲加恩禮而
后頗干預外事且以不謹聞帝與輔臣議將廢之 辛

卯后為左右所逼即簾鉤自縊而崩年三十五 甲午

以遼女真相持詔飭河北邊防 丁酉詔百官奉祠祿

者竝以三年為任 乙巳增定六朝勲臣一百十六人

三月壬子朔日有食之 戊辰進神宗淑妃宋氏為

貴妃 升永安縣為永安軍 癸酉賜上舍生十九人

及第 復置算學 甲戌左街道錄徐知常特授沖虛

先生 辛巳詔濮州王老志賜號安泊處士老志濮之

臨泉人隸東京轉運司為書史自言嘗遇鍾離真人授

內丹要訣棄妻子結草為廬施病者藥善與人言休咎
頗籍籍有聞故有是命 女真阿固達一日率五百騎
突至遼咸州吏民大驚翌日赴詳穩司與趙三等面折
庭下阿固達不屈送所司問狀一夕遁去遣人訴於遼
主詳穩司欲見殺故不敢留自是召不復至 夏四月
甲申宣義郎黃冠言欲令天下士自鄉而升之縣學自
縣學而升之州學通謂之選士其自稱則曰外舍生才
之向成升之內舍則謂之俊士自稱內舍生又其才之

已成而貢之辟廱然後謂之貢士其自稱亦以是從之
戊子作保和殿總為屋七十五間上飾純綠下漆以
朱無文藻繪畫五采垣墉無粉澤以淺墨作寒林平遠
禽竹左實典謨訓誥經史右藏三代彝器東序置古今
書畫西序收琴阮筆硯焉 癸巳尚書右丞鄧洵仁罷
乙巳以福寧殿東建玉清和陽宮 丙午升定州為
中山府 己酉以資政殿學士薛昂為尚書右丞 庚
戌鄭居中等奏編成政和五禮新儀并序例總二百三

十卷目錄六卷詔令頒降 閏月甲寅詔八行許添差

諸州教授從奉議郎王愈奏請也 丙辰改公主為帝

姬郡主為宗姬縣主為族姬於是民間有無主之說又

言姬者饑也亦用度不足之識云

此三語據岳珂愧
鄰錄及清波雜志

戊午復置醫學 辛酉上崇恩皇太后諡曰昭懷 五

月丙申升蘇州為平江府 庚子大盈倉火 壬寅以

築濠播二州進執政官一等 丙午葬昭懷皇后于永

泰陵 丁未詔尚書內省分六司以掌外省六曹所上

之事置內宰副宰內史治中等官及都事以下吏員

己酉詔頒大晟樂于天下其舊樂悉禁 六月丁巳詔

武學州縣外舍生稱武選士內舍生稱武俊士 庚申

尚書省言縣學為升貢之本今天下令佐吏部注授多

非其人俗吏則以學為不急不加察治縱其犯法庸吏

則廢法容姦漫不加省有罪不治以故學生在學毆鬪

爭訟至或殺人蓋令佐不加訓治州學不切舉察提舉

官失於提按以致敗壞如此今立法整飭乞賜指揮施

行從之 癸亥祔昭懷皇后神主于太廟 辛未張商

英特責授汝州團練副使 秋七月癸未升趙城縣為

慶祚軍 甲申還王珪孫固贈諡追復韓忠彥曾布安

燾李清臣黃履等官職 己亥詔置禮制局討論古今

沿革朕將親覽參酌其宜以華千古之陋成一代之典

庶幾先王垂法後世崇寧以來稽古殿多聚三代禮器

若鼎彝簠簋犧象尊壘登豆爵筓璉解玷洗凡古制器

悉出因得見商周之舊始驗先儒所傳大訛至是既置

禮制局乃請御厨所藏悉加討論盡改以從古薦之郊
廟煥然大備有萬壽玉尊者大猶四升器雕琢殊絕玉
玷闊盈尺有二寸帝每祭祀飲福大朝會爵羣臣則用
焉其他多稱是至其制作之精殆與古埒自漢以來未
之有也中書舍人翟汝文奏乞編集新禮改正三禮圖
以示後世卒不果行考異李燾曰實錄於二年七月二十一日已書此詔按三年九月五
日始命劉昫等為禮制局詳議官然則置局當在三年七月實錄誤也
蔡條史補亦係之三年本紀因實錄於二年七月二十一日丙
子書置禮制局今不取
庚子貴妃劉氏薨
壬寅復

置白州 八月甲戌以燕樂成進執政官一等 丙子

以何執中為少師 丁丑升潤州為鎮江府 戊寅封

四鎮山為主 九月庚寅詔大理寺開封府不得奏獄

空其推恩支賜竝罷 辛卯遣兵部員外郎王亶召王

老志赴闕令同本縣長吏以禮敦遣 丁酉詔封老志

為洞微先生老志所居地必生花謂之地錦

此語據宣和錄至

京師館蔡京賜第南園士大夫闐門數召對禁中帝手

書觀妙明真之號賜之 戊戌追冊貴妃劉氏為皇后

諡曰明達 冬十月戊申朔元觀法師程若清封寶籙
先生 庚戌手詔曰朕荷天顧謨錫以元圭內赤外黑
尺有二寸旁列十有二山蓋周之鎮圭有法乎是祇天
之休予以昭事上帝而體其道過周遠矣將來冬祀可
措大圭執鎮圭庶格上帝之心敷佑于下民永為定制
乙丑閱新樂器于崇政殿出古器以示百官 戊辰
詔冬祀大禮及朝景靈宮竝以道士百人執威儀前導
十二月辛巳朝獻景靈宮 壬午饗太廟加上神宗

諡曰體元顯道法古立憲帝德王功英文烈武欽仁聖
孝皇帝改上哲宗諡曰憲元繼道世德揚功欽文睿武
齊聖昭孝皇帝於神宗加法古立憲四字哲宗改顯德
定功曰世德揚功皆蔡京所為以彰紹述之義也 癸
未祀園丘大赦天下升端州為興慶府 帝有事于南
郊蔡攸為執綏官玉輅出南薰門帝忽曰玉津園東若
有樓臺重複是何處也攸即奏見雲間樓殿臺閣隱隱
數重既而審視皆去地數十丈頃之帝又曰見人物否

攸即奏有道流童子持幡節蓋相繼而出雲間衣服眉目歷歷可識 乙酉遂以天神降詔告在位作天真降臨示現記帝嘗夢被召如在藩邸時見老君坐殿上儀衛如王者諭帝曰汝以宿命當興吾教帝受命而出夢覺記其事及是冬祀王老志亦從帝在太廟小次中老志曰陛下昔夢尚記之乎時臣在帝旁也黎明出南薰門見天神降於空中議者謂老志所為道教之盛自此始 癸卯詔補蔭入官人隨處入所在州學仍別為齋

公私試附州學生別作號考校 己丑以賢妃崔氏為

德妃 壬辰築祥州 己亥詔有官人許舉八行 是

月大雨雪連十餘日不止平地八尺餘冰滑人馬不能
行詔百官乘轎入朝 十二月癸丑詔天下訪求道教

仙經 甲寅河北轉運判官張孝純言周官以六藝教

士必射而後行古者諸侯貢士天子試之於射宮乞詔
諸路州郡每歲薦貢士於國學因講射禮從之 乙卯

詔天下貢醫士 丁酉太白晝見 遼生女真部節度

使烏雅舒夢逐狼屢發不能中阿固達前射中之旦日
以所夢問僚佐皆曰吉兄不能得而弟得之之兆也是
月烏雅舒死阿固達襲位為都貝勒遼使愛實布往
謂之曰何故不告喪阿固達曰有喪不能弔而乃以為
罪乎他日愛實布徑至烏雅舒殯所閱賜馬欲取之阿
固達怒將殺之摩囉歡諫而止摩囉歡者烏雅舒之長
子也 是歲江東旱 出宮女二百七十有九人

四年春正月戊寅置道階凡二十六等 甲申知秦州

胡師文進中奉大夫以討論元圭推賞也 辛丑王老
志加號觀妙明真洞微先生 甲辰通判開德王景文
轉奉直大夫與知州差遣仍召赴都堂以元圭得之其
家也 二月丁巳賜上舍生十七人及第 癸亥改清
井監為長寧軍 癸酉皇長子桓冠 三月丙子朔以
淑妃王氏為貴妃 丁丑詔諸路應小學生及百人處
並增差教諭一員 辛卯詔諸路監司每路通選宮觀
道士十人遣發上京赴左右街道錄院講習科教聲讚

規儀候習熟遣還本處 夏四月庚戌幸尚書省以手
詔訓誡蔡京何執中各官遷秩吏賜帛有差 癸丑閱
太學辟廱諸生雅樂 甲寅尚書省言水磨茶場歲收
錢約四百萬貫以上比舊已及三倍不係省錢別無支
用尚循舊例只每季泛進未有月進之數今欲每月進
五萬貫所收錢尚有餘不至闕少詔依所奏仍自今日
為始 甲子改戎州為叙州 五月丙戌初祭地祇于
方澤以太祖配降德音於天下 六月戊午慮四 庚

午詔小學倣太學立三舍法 壬申以廣西溪洞地置
隆允二州 秋七月丁丑置保壽粹和館以養宮人有
疾者 戊寅焚苑東門所儲毒藥可以殺人者仍禁勿
得復貢 申午祔明達皇后神主于別廟 遼主好畋
獵淫酗怠於政事每歲遣使市名鷹於海上道出生女
真使者貪縱徵索無藝女真厭苦之烏雅舒嘗以遼主
不遣阿蘇為辭稍拒其市鷹使者及阿固達襲節度使
相繼遣普嘉努舒古納等索阿蘇遼主終不許舒古納

歸具言遼主驕肆廢弛之狀阿固達乃召其所屬告以
伐遼之故使備衝要建城堡修戎器以聽後命遼主使
侍御愛實布往詰之阿固達曰我小國也事大國不敢
廢禮大國德澤不施而逋逃是主以此字小能無望乎
若還阿蘇朝貢如故苟不獲已豈能束手受制也愛實
布還遼主始為備命統軍蕭托卜嘉調諸軍於寧江州
阿固達聞之使布格呼復索阿蘇實觀其形勢布格呼
還言遼兵多不知其數阿固達曰彼初調兵豈能遽集

如此復遣華沙布往還言惟四院統軍司與寧江州軍
及渤海八百人耳阿固達曰果如吾言謂諸將佐曰遼
人知我將舉兵集諸路軍備我我必先發制之無為人
制衆皆曰善乃入見頗拉舒妻富察氏告以伐遼事富
察氏曰汝嗣父兄立邦家見可則行吾老矣無貽我憂
汝亦必不至是阿固達奉觴為壽即奉富察氏率諸將
出門舉觴東向以遼人荒肆不歸阿蘇并已用兵之意
禱於皇天后土酹畢富察氏命阿固達正坐與僚屬會

酒號令諸部使博勒和徵伊蘭路舒古納兵烏楞古阿
嚕撫諭烏格集賽兩路係遼籍女真蘇布特往溫都路
執遼障鷹官達嚕克部副使辭列寧江州渤海大嘉努
八月乙巳改端明殿學士為延康殿學士樞密直學
士為述古殿直學士 辛亥詔諸路學校及三百人以
上者三分增一分百人以上者增一分之半 癸亥定
武臣橫班以五十員為額 九月辛卯詔以辟廱大成
殿名頒諸路州學從河南尹蔡安持奏也 己亥詔諸

路兵應役京師者竝以十月朔遣歸 是月女真阿固
達舉兵伐遼進軍寧江州次寥晦城博勒和徵兵後期
杖之復遣督軍諸路兵皆會于來流水得二千五百人
致遼之罪申告於天地曰世事遼國恪修職貢定烏木
罕謀罕之亂破蕭哈里之衆有功不省而侵侮是加罪
人阿蘇屢請不遣今將問罪於遼天地其鑒佑之遂命
諸將傳檄而誓曰汝等同心盡力有功者奴婢部曲為
良庶人官之先有官者叙進輕重眊功苟違誓言身死

挺下家屬無赦師次唐古岱幹甲之地諸軍穰射介而立有光如烈火起於人足及戈矛之上人以為兵祥明日次札只水光見如初將至遼界先使尼雅滿督士卒夷塹既度遇渤海軍攻左翼齊默克衆少却遼兵直抵中軍舍音出戰齊達先驅阿固達曰戰不可易也遣尼雅滿止之尼雅滿馳出舍音前控止齊達馬舍音遂與俱還遼兵從之耶律謝十墜馬遼人前救阿固達射救者斃併射謝十中之有騎突前又射之徹札洞胸謝十拔箭走

追射之中其背債而死尼雅滿與數騎陷遼軍中阿固達
救之免胄戰或自傍箭之矢拂於額阿固達顧見射者
一矢而斃謂將士曰盡敵而止衆從之勇氣自倍遼軍
大奔蹂踐死者十七八薩噶在別路不及會戰阿固達
使人以戰勝告之薩噶遣其子尼瑪哈及固紳來賀且
勸稱帝阿固達曰一戰而勝遂稱大號何示人淺也軍
至寧江州填塹攻城寧江人自東門出溫迪痕阿徒罕
邀擊盡殪之遼統軍司以聞遼主射鹿於慶州略不介

意遣海州刺史高仙壽統渤海軍應援而已冬十月寧江州陷防禦使大藥師努被獲阿固達陰縱之使招諭遼人遂引兵還謁富察氏以所獲碩宗族耆老初女真部民皆無徭役壯者悉為兵平居則漁畋射獵有警則下令諸部之長凡步騎之仗糗皆自備焉其部長曰貝勒行兵則稱曰明安穆琨明安猶千夫長穆琨猶百夫長也壬寅遼主聞寧江州陷召羣臣議漢人行宮副部署蕭圖薩溫曰女真雖小其人勇而善射我兵久不

練若遇強敵稍有不利諸部離心不可制矣今莫若大
發諸道兵以威壓之北院樞密使蕭達爾丹曰如圖薩
溫之謀徒示弱耳但發滑水兵足以拒之乃以司空蕭
嗣先為東北路都統蕭托卜嘉副之發契丹奚軍三千
人中京禁兵及土豪二千人別選諸路武勇二千餘人
屯出河店 乙巳復置拱州 十一月辛未觀妙明真
洞微先生王老志卒老志乞歸留之不得尋卒賜金以
葬贈正議大夫 遼都統蕭嗣先等將步騎諸軍會于

鴨子河北

考異遼史天祚本紀作混同江今從金史太祖本紀

阿固達帥衆來禦

未至鴨子河會夜阿固達方就枕若有扶其首者三寤而起曰神明警我也即鳴鼓舉燧而行黎明及河遼兵方壞凌道阿固達選壯士千人擊走之因帥衆繼進遂登岸與遼兵遇於出河店會大風起塵埃蔽天阿固達乘風奮擊遼兵潰逐至倭稜灤殺獲不可勝計遼將士得免者十有七人樞密使蕭奉先懼兄嗣先得罪輒奏東征潰軍所至劫掠若不肆赦恐聚為患遼主從之嗣

先但免官而已於是諸軍相謂曰戰則有死無功退則
有生無罪故士無鬪志見敵輒潰 壬辰遼都統蕭迪

里等營于倭校灤又為女真兵所襲死者甚衆迪里亦
坐免官遼人嘗言女真兵滿萬則不可敵至是始滿萬
云 十二月己酉以禁中神御殿成減天下囚罪一等

癸丑定朝儀奉直大夫以八十員為額 乙卯雪降

賜宴于蔡京第 己未詔廣南市舶司歲貢真珠犀角
象齒 環州定遠大首領夏人李訛哆以書遺其國統

軍梁哆陵曰我居漢二十年每見糧草轉輸例給空券
方春末秋初士有饑色若竟擣定遠唾手可取既得定
遠則旁十餘城不攻而下矣我儲穀累歲掘地藏之大
兵之來斗糧無齎可坐而飽也哆陵遂以萬人來迎轉
運使任諒先知其謀募兵盡發窖穀哆陵圍定遠失所
藏越七日訛哆遂以其部萬餘人歸夏夏築城河底城
詔童貫為陝西經略使以討之 遼賓祥咸三州及鐵
驪部叛降于女真武奇邁薩噶辭不失率官屬詣阿固

達勸進願以新歲元日上尊號阿固達不許阿里罕普
嘉努尼雅滿等進曰今大功已建若不稱尊號無以繫
天下心阿固達曰吾將思之

資治通鑑後編卷九十八

欽定四庫全書

資治通鑑後編卷九十九

刑部尚書徐乾學撰

宋紀九十九

起旃蒙協洽正月盡疆圉作噩十二月凡三年

徽宗體神合道駿烈遜功聖文仁德憲慈顯孝皇帝

政和五年春正月壬申朔遼生女真部節度使阿固達因其下奉上尊號遂即皇帝位謂其下曰遼以賓鐵為

號取其堅也實鐵雖堅終亦變壞惟金不變不壞金之色白完顏部色尚白於是國號大金改元收國更名旻丙子自將攻黃龍府進臨益州州人走保黃龍取其餘民以歸 丙戌瀘南晏州夷卜漏等反攻梅嶺堡陷之晏州六縣水路十二村及十州五村團思義洞諸熟夷素黠勇善鬪大中祥符元豐間屢為邊患瀘帥賈宗諒武人也喜生事嘗以需竹木擾夷夷怨之至是又誣致其酋斗箇旁等罪杖脊黥配諸夷憤怒卜漏遂主盟

合從入寇因上元張登襲破梅嶺堡知寨高公老妻族
姬也公老嘗攜族姬以金玉器與卜漏輩飲思我洞卜
漏艷之故來攻公老遁去遂略其妻及金玉四出焚掠
以歸族姬濮安懿王之曾孫於帝服屬為近事聞帝甚
駭時蜀久安人異懷不習兵所至闕戰守備遠近聞警
騷動梓州轉運使趙適按部次昌州即馳至瀘而提
點刑獄賈若水亦至適恐賊逾瀘水益難禦乃急督宗
諒躬率兵進屯江安縣據水當賊衝且以近邊諸壘轉

餉給軍儲備無乏若水摘比近巡尉兵既至又成都利
變路援師亦集與宗諒所部得衆萬餘逮賊再犯武寧
樂共梅嶺宗諒出兵與賊戰官軍大衄裨將陳世基等
死之賊屢勝愈猖獗出沒無虛日蜀土大震

此據長編
所載趙適

行狀
修入

已丑令諸州縣置醫學立貢額 甲午改龍州

為政州 遼遣行軍都統耶律鄂爾多左副統蕭伊實
右副統耶律卓諾都監蕭色佛呼率騎二十萬步卒七
萬戍邊金主率兵趨達魯克城次寧江州西遼主下詔

親征遣僧嘉努持書約和斥金主舊名且使為屬國金主遣薩喇復書若歸叛人阿蘇遷黃龍府於別地然後議之 庚子進師有火光正圓自空而墜金主曰此祥徵殆天助也酌白水而拜將士莫不喜躍進逼達魯克城金主登高望遼兵若連雲灌木狀顧謂左右曰遼兵心貳而情怯雖多不足畏遂趨高阜為陣摩囉歡以右翼先馳遼左軍却左翼出其陣後遼右軍皆力戰羅索尼楚赫衝其中堅凡九陷陣皆力戰而出尼雅滿請以中

軍助之金主使鄂特本往為疑兵摩囉歡已得利擊遼右
軍遼兵遂敗乘勝追躡至其營會日已暮圍之黎明遼
軍潰圍出逐北至阿魯岡遼步卒盡殪是役也遼人本
欲屯田且戰且守故金并得其耕具以給諸軍 童貫
遣熙河經畧使劉法將步騎十五萬出湟州秦鳳經畧
使劉仲武將兵五萬出會州貫以中軍駐蘭州為兩路
聲援仲武至清水河築城屯守而還法與夏右廂軍戰
于庫庫哩大敗之斬首三千級 二月乙巳立定王桓

為皇太子 甲寅冊皇太子赦天下 庚午以童貫領

六路邊事時永興鄜延環慶秦鳳涇原熙河各置經畧
安撫司以貫總領之於是西兵之柄皆屬於貫 遼饒

州渤海古裕等反自稱大王遼主遣蕭色佛呼等討之

三月辛未朔太白晝見 癸酉張商英復通奉大夫

提舉崇福宮 梓州路轉運使趙適密奏賈宗諒激變

晏夷之罪且曰瀘南邊事轉運司官不當干預臣不敢

坐視已收羸兵馳赴樂共城權行招安之策庶邊徼早

得寧息然適本意乃欲專事進討兵端愈大矣詔罷宗
諒代以康延魯而聽適節制 甲申追論至和嘉祐定
策功封韓琦為魏郡王復文彥博官 丁亥詔以立皇
太子見責降文武臣僚並與牽復甄叙凡千五百人
壬辰升舒州為德慶軍 癸巳賜禮部奏名進士出身
六百七十人 夏四月甲辰作葆真宮 丙午趙適奏
節次招到晏州夷賊千餘人及首領斗岡等二百四十
七人又說諭到賊首卜漏等千餘人俱來梅賴村壩去

軍城十里與所差使臣同刺猫牲雞血和酒飲誓稱一
心歸宋更不作過比引至公庭臣與走馬承受丁升卿
引問於聽事之所先以疏其過惡次以明敷君父不殺
之恩率皆面闕稽顙再拜以謝臣即擣以酒食錫以銀
綵俾令著業遂分兵修復梅嶺堡兼創築諸城寨以備
不虞 丁未詣景靈宮還幸祕書省進館職官一等

庚戌改集英殿為右文殿 癸丑遼蕭色佛哱等為渤海古裕所敗以南面副部署蕭圖薩溫為都統赴之圖

薩溫與古裕戰復敗績 癸亥置宣和殿學士詔東宮
講讀官罷讀史 遼主使耶律卓諾等齎書使金主
亦斥遼主名以報之且諭之使降 癸丑以修三山河
橋降德音于河北京西路蔡京以孟昌齡為都水
使者獻議導河大伾可置永遠浮橋謂河流自大伾之
東而來直大伾山西而止數里方回南東轉而過復折
北而東則又直至大伾山之東地形水勢迫東相直曾
不十餘里且地勢卑下可以成河倚山可為馬頭又有

中潭正如河陽若引使穿大伾山及東北二小山分
為兩股而過合於下流因三山為趾以繫浮梁省費數
十百倍可寬河朔諸路之役朝廷喜而從之置提舉修
築浮橋所調役夫數十萬民不聊生至是工畢詔提舉
所具功力等第聞奏又詔居山至大伾山浮橋屬濬縣
者賜名天成橋大伾山至汶子山浮橋屬滑州者賜名
榮光橋俄改榮光曰聖功御製橋銘磨崖刻之昌齡遷
工部侍郎方河之開也水流雖通然湍激猛暴遇山稍

隘往往泛溢近砦民夫多被漂溺因及通利軍後遂注
成巨澤云 秋七月戊辰朔日有食之 乙亥升汝州

為陸海軍 丁丑詔建明堂于寢殿之南 趙適奏晏

州夷賊渝盟作過出沒剽掠若置而不問恐養成姦惡
別生大患不可不早為之計但事力未勝不敢輕舉深
入乞就秦鳳涇原環慶路共調兵二萬前來攻討詔永
興路選兵二千人赴之 辛巳又詔涇原發兵三千環
慶二千押赴瀘南聽用仍以趙適為瀘南招討統制使

王育馬覺為同統制雷迪丁升卿軍前承受孫義叟王
良弼應副錢糧並聽趙邁節制 甲申以昭慶軍節度

使蔡卞為開府儀同三司 是月遼使錫喇以國書致

金主金主留之不遣遼九百奚營降于金 八月戊戌

金主自將攻黃龍府次混同江無舟金主使一人導前

乘赭白馬徑涉曰視吾鞭所指而行諸軍隨之水及馬

腹後使舟人測其渡處深不得其底 己亥都水監言

大河已就三山通流正在通利之東慮水溢為患乞移

軍城於大伾山居山之間以就高仰從之 已酉詔祕
書省移於他所以其地為明堂杭州觀察使陳彥言明
堂基宜正臨丙方稍東以據福德之地故有是詔命蔡
京為明堂使開局興工日役萬人 庚戌詔中書舍人
陳邦光提舉洞霄宮池州居住先是邦光以中書舍人
兼太子詹事會蔡京獻太子以大食琉璃酒器羅列宮
庭太子怒曰天子大臣不聞道義相訓乃持玩好之具
蕩吾志耶命左右擊碎之京聞邦光實激太子含怒未

發因事遂斥邦光 辛亥升通利軍為濬州 嗣濮王

仲增薨弟仲御嗣 丙寅陳瓘特叙承事郎許任便居

住緣立太子赦也瓘既寓通州而盛章與石忝有隙取

密旨編置通州揚言為瓘執仇瓘聞而歎曰此豈盛世

所宜有耶因謀徙避遂挈家至九江卜居焉 九月丁

卯朔遼黃龍府陷于金金主遣遼使錫喇還遂班師至

混同江徑渡如前金尼雅滿烏珠等遺書遼主陽為卑哀

之辭實欲求戰遼主怒下詔親征有女真作過大軍翦

除之語金主聚衆塲面仰天慟哭曰始與汝等起兵蓋
苦契丹殘忍欲自立國今天祚親征奈何非人死戰莫
能當也不若殺我一族汝等迎降轉禍為福諸軍皆曰
事已至此惟命是從王厚與劉仲武合涇原廊延環
慶秦鳳之師攻夏臧底河城敗績死者十四五秦鳳等
三將全軍萬人皆沒厚懼罪重賂童貫匿不以聞未幾
夏人太掠蕭關而去遼師渡混同江副都統耶律卓
諾反奔上京謀迎立魏國王淳遼主遣駙馬蕭昱領兵

詣廣平淀護后妃行宮小底伊遜持書馳報淳時卓諾
先遣淳妃親弟蕭迪里以所謀說淳淳曰此非細事主
上自有諸王當立北南面大臣不來而汝言及此何也
密令左右拘之有頃伊遜齎御札至備言張奴等謀廢
立事淳立斬迪里首以獻單騎間道詣廣平淀待罪遼
主遇之如初卓諾知淳不見聽乃率麾下掠取上京府
庫財物至祖州率其黨告太祖廟數遼主過惡移檄州
縣遂結渤海羣盜數萬趨廣平犯行宮不克北趨降虜

山順國女真阿固察以三百騎一戰勝之擒其貴族二百餘人並斬以徇餘得脫者皆奔金卓諾詐為使者亦欲奔金為邏者所獲縛送行在腰斬於市剖其心以獻祖廟支解以徇五路 冬十月癸卯以嵩山道人王仔昔為沖隱處士仔昔豫章人始學儒後自言遇許遜真君授以大洞隱書豁落七元之法能知人禍福王老志死後仔昔來都下帝知之召令踵老志事寓蔡京第因有是命 己酉趙邁統兵發江安縣親督王育由樂共

城路命馬覺以別部由長寧軍路張思正由梅嶺堡水
蘆檀中路期悉會于晏州輪縛大囤合陝西三路兵并
本路土軍義軍土丁子弟保甲弓手人夫共三萬五百
四十人 戊午夏人入貢 十一月癸酉錄昭憲皇后
杜氏之裔 庚辰趙適攻破晏州輪縛大囤夷賊卜漏
遁去官軍追獲之降者相繼而至諸囤悉平初王育等
既攻破上下落樣村及思義州所向若破竹無不即下
適遂與馬覺張思正軍皆至輪縛大囤其山崛起數百

仍周四十餘里卜漏居之凡諸國之奔亡者悉歸於此
共保聚拒守賊自上施矢石直瞰官軍中者即壘粉官
軍以強弓弩射之曾不能及半凡累日將士相顧無計
瀘州都巡檢使种友直山西將家子沉密能任事思黔
州巡檢田祐恭本思黔夷所部土丁藥箭手輕趨習山
險適乃微服乘馬命友直祐恭從按視形勢見山隈崖
壁尤陡絕賊以險故不設備適乃悉移軍當賊而命二
人率所部軍于下謂曰此處崖壁疑可以計登且山多

孫思黯人善能捕取汝等亟辦之信宿友直捕得生孫
數千適喜曰事濟矣乃悉以成算授友直且令諸軍曰
各備雲梯視山上火發即以進是日友直選所部與祐
恭之衆得二千餘紉麻為長炬灌以膏蠟使羣孫背負
之暮夜先以數輩登崖巔繫繩梯數十絕而下衆各銜
枚挈羣孫次第挽繩梯而登雞方唱衆已悉登及柵乃
燃炬縱孫賊廬舍皆茅竹為之羣孫所歷火輒發賊奔
呼撲救不暇孫益驚跳火益熾爭前驅逐羣孫官軍已

破柵鼓譟擊其後賊猶與官軍力鬪遙望火發令諸軍
撾鼓俱以雲梯進賊蹂亂官軍內外相應遂斬關環城
而登卜漏從諸酋突圍遁適命友直及統領官劉慶以
步騎五千追至山後擒卜漏及諸酋長適自入賊境至
破輪縛凡所平州二縣八諸囤三十餘城以其地之要
害者建置寨堡拓地環二千餘里皆衍沃宜種植畫其
疆畝募並邊之人耕之使習戰守如西北弓箭社之制
號曰勝兵適自出師迄還纔兩月鬚髮為之盡白 庚

寅高麗遣子弟入學 是月遼主自將親軍七十萬至

駱駝門駙馬蕭特默林牙蕭察喇等將騎兵五萬步卒四

十萬至沃梭濼金主自將禦之 十二月己亥升遂州

為遂寧軍 丙午以趙適為龍圖閣直學士知熙州

金主行次爰刺會諸將議皆曰遼兵號七十萬其鋒未

易當吾軍遠來人馬疲乏宜深溝高壘以待從之 丁

未金主以騎兵親候遼軍獲督餉者知遼主以耶律卓

諾叛西還二日矣諸將請追擊之金主曰敵來不迎戰

去而追之欲以此為勇耶衆皆慄愧願自効金主曰誠欲追敵約齋以往無事餽饋若破敵何求不得衆皆奮躍追及遼主于護步答岡是役也兵止二萬金主曰彼衆我寡兵不可分視其中軍最堅其主必在焉敗其中軍可以得志乃使右翼先戰兵數交左翼合而攻之遼兵潰金師馳之橫出其中死者相屬百餘里獲輿輦幣幄兵械軍資他寶物馬牛不可勝計金師乃還 己未遼錦州刺史耶律珠徹叛應卓諾遣北面林牙耶律瑪

格討之 庚申以平晏夷曲赦四川 癸亥置瀘南沿

邊安撫司以孫義更為集賢殿修撰知瀘州充安撫使

是歲平江府常湖秀三州水 六年春正月丙寅朔

遼東京有惡少年十餘乘酒執刃踰垣入留守府問留

守蕭保先所在今軍變請為備保先出刺殺之戶部使

大公鼎聞亂即攝留守事與副留守高清明集奚漢兵

千人盡捕其衆斬之撫定其民東京故渤海地遼太祖

力戰二十餘年乃得之而保先嚴酷北海苦之故有是

變其裨將渤海高永昌時以兵三千屯八廐口見遼政日衰金勢方強遂覬覦非常誘渤海并戍卒入遼陽據之旬日之間遠近響應有兵八千人因僭號稱隆基元年遼主遣蕭伊實高興順招之永昌拒命不從戊子以瀘南獻捷轉宰執一官以童貫為陝西河北宣撫使是日金主下詔曰自破遼兵四方來降者衆宜加優恤自今諸部官民已降或為軍所俘獲逃遁而還者勿罪仍官其酋長且使從宜居處閏月壬寅升潁州

為順昌府 庚申太府寺丞王鼎奏五禮新儀既已成
書欲乞依倣新樂頒行之仍許令州縣召募禮生肄業
於官使之推行民間專以新儀從事 辛酉開封府尹
王革奏乞下國子監委學官將新儀內冠昏喪祭民間
所當通知者別編類作一帙鏤板付諸路學事司勸諭
學生務令通知節文之意並從之 遼貴德州耶律伊
都以廣州渤海叛附高永昌遼主遣蕭韓嘉努張琳討
之 二月壬申令道教改隸祕書省 癸未詔訪聞棣

州士人劉棟疏食葆神虛心契道人之隱奧洞然照知
處方書符每有應驗可令敦遣赴尚書省審驗外於上
清寶籙宮安下仍給路費驛券遞馬無令失所 丁亥
詔增廣天下學舍 庚寅詔廣京城 遼侍御司徒托
卜嘉等討卓諾戰于祖州敗績復遣漢人行宮都部署
蕭特默率諸將討之卓諾誘饒州渤海及中京賊侯槃
等萬餘人攻陷高州 三月癸丑賜上舍生十一人及
第 乙卯賜王仔昔號通妙先生 夏四月乙丑會道

士於上清寶籙宮宮建於景龍門對晨暉門密連禁署
用道士林靈素言也靈素永嘉人少從浮屠學苦其師
笞罵去為道士左街道錄徐知常引之以附會諸閹時
王仔昔寵稍衰帝訪方士於知常以靈素對一見帝視
如舊識靈素大言曰天有九霄而神霄最高其治曰府
神霄玉清王者上帝之長子主南方號長生大帝君陛
下是也既下降於世其弟號青華帝君者主東方攝鎮
之已乃府仙卿曰褚慧亦下降佐帝君之治又目蔡京

為左元仙伯王黼為文華吏蔡攸為園苑寶華吏鄭居
中劉正夫盛章王革及諸巨閹皆有名位而貴妃劉氏
方有寵則曰九華王真安妃也帝心獨喜其說賜號通
真先生作上清寶籙宮帝時登皇城下視之由是開景
龍門城上作複道通寶籙宮以便齋醮之事 辛未尚
書右僕射何執中致仕執中輔政一紀年高疾甚賜之
寬告他日造朝命止赴六參起居退治省事遂以太傅
就第朝朔望儀物廩稍一如居位時入見帝曰自相位

致為臣數十年無此矣執中對曰昔張士遜亦以舊學
際遇用太傅致仕與臣適同帝曰當時恩禮恐未必爾
執中頓首謝未幾卒贈太師清源郡王諡正獻執中嘗
為端王侍講故終始恩遇不替然無所建明惟以謹畏
迎順主意贊飾太平而已 丁丑詔天寧諸節及壬戌
日杖以下罪聽贖 丙戌卻監司守臣進獻 蔡京三
上章乞致仕帝不允 庚寅詔京三日一造朝正公相
位通治三省事 辛卯高陽關路安撫使吳玠言冀州

棗強縣黃河清詔許稱賀 五月甲午朔令蔡京遇朔
望赴朝三日一知印當筆不赴朝日許府第書押尋又
詔自今遇有奏事非造朝日亦赴仍許正謝 丁酉廢
錫錢 庚子以鄭居中為少保太宰兼門下侍郎劉正
夫為特進少宰兼中書侍郎時蔡京大興工役民不聊
生變亂法度吏無所師居中每為帝言帝亦惡京專乃
拜居中太宰使伺察之又以正夫議論數與京異拜為
少宰居中存紀綱守格令抑僥倖振淹滯士論翕然望

治 壬寅以保大軍節度使鄧洵武知樞密院事 是
月金達嚕攻高永昌殺之遂陷遼東京州縣永昌使托
卜嘉必罕求援于金且曰願併力以取遼金主使呼寶
布謂永昌曰同力取遼固可東京近地汝輒據之以僭
大號則不可若能歸款當授王爵永昌不從金主乃遣
達嚕帥諸軍攻永昌遇遼兵敗之遂取瀋州永昌聞之
大懼使家奴鐸刺詣金師請去僭號稱藩達嚕知其詐
進兵攻之永昌遂殺胡沙補等率衆拒金遇于活水金

師既濟永昌之軍不戰而却逐北至遼陽城下明日永昌盡率其衆與金戰大敗以五十騎奔長松島遼陽人恩勝努仙格執永昌妻子以城降托卜嘉亦執永昌以獻金主命殺之於是遼之東京州縣及南路係遼女真皆降于金金主詔除遼法省賦稅置明安穆琨以達魯為南路都統倭楞知東京事六月乙丑遼籍諸路兵有雜畜十頭以上者皆從軍丙寅班中書官制格

庚午慮囚甲戌詔堂吏遷官至奉直大夫止庚辰

遼以秦晉國王淳為上京留守蕭托卜嘉為契丹行宮
都部署兼副元帥 癸未皇太子立妃朱氏妃祥符人
武泰軍節度使伯材女也 秋七月壬辰朔以震武城
為震武軍 甲午以德妃崔氏為貴妃 辛亥晏州夷
賊卜漏及沅州黃安俊定邊軍李吡嘑並伏誅詔函首
于甲庫 壬子曲赦湖北 戊午蔡京請名三山橋銘
閣曰續禹冀文之閣門曰銘功之門 己未解池生紅
鹽 辛酉改走馬承受公事為廉訪使者 遼渤海二

千餘戶叛東北路統軍使勒兵追及盡俘以還 八月

壬戌朔戒北邊帥臣毋生事 庚辰蔡京奏臣昨以年

逮七十加之疾病乞解機務蒙恩特許三日一朝今臣

病已痊筋力尚可勉強伏望許臣日奉朝請其治事即

依已降指揮從之 壬午詔天下監司郡守搜訪巖谷

之士雖恢詭譎恠自晦者悉以名聞 丁亥詣建隆觀

遂幸蔡京賜第 己丑升晉州為平陽府壽州壽春府

齊州濟南府 是月金薩哈陷遼保州保州本高麗地

薩哈攻之久不克請濟師金主乃益薩哈兵至是拔之
九月辛卯朔帝奉玉冊玉寶詣玉清和陽宮上尊號
曰太上開天執符御歷含真體道昊天玉皇上帝蓋以
論者析玉皇大天帝昊天上帝言之不能致一故也

丙申赦天下令洞天福地修建宮觀塑造聖像又禁中

外不許以龍天君王帝上聖皇等為名字

禁人名字事
據洪邁容齋

續筆
增入

癸卯詔定鼎閣於天章閣以方士王仔昔言九

鼎神器宜納之禁中不可處外也命蔡京為定鼎禮儀

使 己未以童貫為開府儀同三司 冬十月乙丑太

白晝見 戊寅張商英復觀文殿學士 甲申詔誠感

殿長生大帝君神像可遷赴天章閣西位鼎閣奉安考

李燾據王黼宣和殿降聖記云歲在丁酉皇帝乃悟本
長生大帝君丁酉蓋政和七年也蔡條史補亦云政和
七年林靈素有神霄玉清王者之說則六年猶未有長
生大帝君因此條為誤書今按宋史六年四月書會
道士于上清寶籙宮則其時靈素已見幸宮已建而像
已設黼條所言乃降神之事耳非謂建宮設像亦在七

年也 辛卯蔡京等言冀州三山河清乞拜表稱賀 遼

烏古部叛遣中丞耶律托卜嘉等招之 庚辰烏爾固部

來降 十一月甲午詔帝鼐改為隆鼐正南彤鼎為明
鼎西南阜鼎為順鼎正西皐鼎為蘊鼎西北魁鼎為健
鼎正北寶鼎依舊東北牡鼎為猷鼎正東蒼鼎為育鼎
東南岡鼎為潔鼎鼎閣為圜象徽調之閣閣上神像左
周鼎星君中帝席星君右大角星君閣下鼎鼐神像各
守逐鼎排列亦用王仔昔建議也 己亥祀圜丘赦

庚子以禮部尚書白時中為尚書右丞 戊申以侯蒙
為中書侍郎薛昂為尚書左丞 夏人大舉攻涇原靖

夏城時久無雪夏人使數萬騎繞城踐之塵起漲天乃
潛穿壕為地道入城中城遂陷屠之而去 十二月庚
申朔金諳巴貝勒武奇邁及羣臣上其主尊號曰大
聖皇帝改明年為天輔元年 己巳以婉儀劉氏為賢
妃 乙亥遼封庶人蕭氏為太皇太妃 戊寅以熙河
進築功成進執政一官 乙酉奠九鼎于圜像徽調閣
翼日復詣閣行香百官陪位 特進少宰劉正夫罷正
夫由博士入都馴致宰相能迎時上下持祿養權至是

以開府儀同三司致仕 是歲出宮女六百人 茂州
夷邛永壽內附以其地置壽寧延寧軍

七年春正月乙未令天下道士與免堦墀迎接衙府宮
觀科配借索騷擾郡官監司相見依長老法 庚子以
殿前都指揮使高俅為太尉 是月金軍攻遼春州遼
東北面諸軍不戰自潰女古皮室四部及渤海人皆降
于金金舍音復陷泰州 二月癸亥以大理國主段和
譽為雲南節度使大理國王 甲子詔通真先生林靈

素於上清寶籙宮宣諭青華帝君降臨事初劉混康虞
仙姑王老志王仔昔皆為帝所禮然其神恠事多出自
方士也及靈素至乃以事歸之於帝而曰已獨佐之每
自號小吏佐治故上下莫有攻其非者然靈素實無術
徒敢為大言是時帝興道教將十年獨思未有一厭服
羣下者靈素因希指造為青華帝君夜降宣和殿事假
帝誥天書雲篆帝乃會道士二千餘人于上清寶籙宮
俾靈素宣諭其事左街道錄傅希烈等皆作記上之

此據

蔡條史
補增修

丁卯御右文殿策高麗進士 辛未詔天下

天寧萬壽觀改為神霄玉清萬壽宮仍於殿上設長生

大帝君青華帝君聖像 乙亥幸上清寶籙宮命靈素

講道經自是每設大齋費緡錢數萬謂之千道會令士

庶入殿聽講帝為設幄其側靈素據高座使人於下再

拜請問然所言無殊絕者時時雜以捷給嘲詆以資娛

笑復令吏民詣宮受神霄祕籙朝士之嗜進者亦靡然

趨之 三月庚寅賜高麗祭器高麗進士權適等四人

賜上舍及第 乙未以童貫權領樞密院 丙申升鼎

州為常德軍節度 壬子御製明堂上梁文 夏四月

庚申帝諷道錄院曰朕乃昊天上帝元子為神霄帝君
觀中華被金狄之教焚指煉臂捨身以求正覺朕甚憫
焉遂哀懇上帝願為人主令天下歸於正道帝允所請
令弟青華帝君權朕神霄之府朕夙夜警懼尚慮我教
所訂未周卿等可上表章冊朕為教主道君皇帝於是
羣臣及道錄院上表冊之然止用於教門章疏而不施

於政事也 辛酉升温州為應道軍節度為林靈素也

丙子詔親祀明堂 五月戊子朔升慶州為慶陽軍

節度渭州為平涼軍節度 己丑詣玉清和陽宮上地

祇徽號詔曰王者父天母地乃者祇率萬邦黎庶強為

之名以玉冊玉寶昭告上帝而地祇未有稱謂謹上徽

號曰承天效法厚德光大后土皇地祇詣宮上寶冊儀

禮一如上帝 辛卯命蔡攸提舉秘書省并左右街道

錄院 乙未詔權罷宮室修造 辛丑祭地于方澤降

德音于諸路

以監司州縣共為姦賊令廉訪使者察

奏仍許民徑赴尚書省陳訴

癸卯改玉清和陽宮為

玉清神霄宮

丁未詔應監司兼領措置起發花石

六月戊午朔以明堂成進封蔡京為陳魯國公京辭兩

國不拜詔官其親屬二人

己未童貫加檢校少傅梁

師成為檢校少保宣和殿學士蔡攸盛章開封尹王革

顯謨閣待制蔡儵蔡脩各遷官有差皆以明堂成推賞

也

乙亥蔡京等上表請御明堂聽朝頒常視朔詔答

不允表三上乃從之 壬午詔禁巫覡 丙戌貴妃宋

氏薨 秋七月丁亥令僧徒如有歸心道門願為道士

者許赴輔正亭陳訴立賜度牒紫衣 壬辰熙河環慶

涇原地震 庚子詔八寶內增定命寶今後以九寶為

稱仍以定命寶為首 建隆以來熟女真嘗由蘇州泛

海至登州賣馬故道雖存久閉不通至是女真蘇州漢

兒高藥師曹孝才及僧即榮等率其親屬二百餘人以

大舟浮海欲趨高麗避亂是月為風漂達我界馳基島

備言女真既斬高永昌渤海漢兒羣聚為盜契丹不能制女真攻契丹奪其地已過遼河之西知登州王師中具奏其事朝廷固欲交女真圖契丹聞之甚喜乃詔蔡京及童貫等共議即共奏國初時女真常貢奉而太宗屢詔市馬女真其後始絕宜降詔遵故事以市物為名就令訪聞事體虛實乃詔師中選差將校七人各借以官用平海指揮兵船載高藥師等齎市馬詔泛海以往考異李燾曰此據金盟本末稍增以北征記如蔡條所云蔡京久不知上曰太師莫是要作禮數否今皆不取

條私為其父諱獨歸其事於童貫耳要京與貫皆始禍者京偶以十一月六日免簽細務遂欲藉此欺世人固不信也

政和初蔡京被召帝戲京子攸謂須進土宜遂得橄欖一小株雜諸草木進之當時以為珍其後又有使臣王永從士人俞輞皆隸蔡攸每花石至動數十舟盛章守蘇州及歸作開封尹亦主進奉然朱勔之綱為最四年以後東南郡守二廣市舶率有應奉多主蔡攸至是則又有不待旨者但進物至計會諸閹人閹人亦爭取以獻焉天下乃大騷然矣大率太湖靈璧慈谿武

康諸石二浙花竹雜木海錯福建異花荔子龍眼橄欖
海南椰實湖湘木竹文竹江南諸果登萊淄沂海錯文
石二廣四川異花奇果貢大者越海渡江毀橋梁鑿城
郭而至植之皆生成異味珍苞率以健步捷走雖萬里
用四三日即達色香未變也蔡京因奏陛下無聲色犬
馬之奉所尚者山林竹石乃人之棄物但有司奉行過
當可節其浮濫而懲艾之乃作提舉人船所命巨閤節
文誥領馬又詔監司郡守等不許妄進其係應奉者獨

令朱勔蔡攸王永從俞輞陸漸應安道六人聽旨他悉
罷之由是稍戢未幾天下復爭獻如故又增提舉人船
所進奉花石綱運所過州縣莫敢誰何殆至劫掠遂為
大患

此據長編所載
蔡條史補修入

八月丙辰宣和殿大學士蔡攸

奏莊列亢桑子文子皆著書以傳後世今莊列之書已入
國子學而亢桑子文子未聞頒行乞取其書精加讎定
列於國子之籍與莊列並行從之 癸亥詔明堂并祀
五帝 少保太宰鄭居中以母憂去位居中與蔡京不

相能及居喪京懼其起復以居中王珪之壻乃使蔡確
子懋重理定策事以沮之遂追封確清源郡王御製碑
文立石墓前而擢懋同知樞密院事懋即渭也 丙寅
遼命都元帥秦晉王淳赴沿邊會四路兵馬防秋 金
之拔保州也高麗兵已在城中金人入守高麗王使蒲
馬如金賀捷且曰保州本吾舊地願以見還金主曰保
州近爾邊境聽爾自取今乃勤我師徒破敵城下地何
可得也 九月戊子詔湖北民力未舒胡耳西道可罷

進築 辛卯祀上帝于明堂以神宗配享赦天下 乙
未特進少宰劉正夫卒 丙申以御史中丞王安中為
翰林學士安中之為中丞也一日請對曰臣起諸生蒙
陛下親擢備員中執法日夜懼無以報今臣所論事關
宗社儻陛下少留聽採幸甚帝悚然安中出袖中疏所
論乃蔡京也帝曰誠如卿言安中即伏奏曰臣孤遠一
介不自量力輒論大臣京老姦多智必將為所中害自
此竄逐無復再望清光矣願拜辭帝曰勿如此當為卿

罷京時蔡攸日夜出入禁中盡率子弟見帝泣且拜帝
曰中司文字如此奈何攸等固懇曰陛下儻全臣宗乞
移安中一別差遣則事自己矣帝惻然許之安中方草
第三疏翌日求對中夜有扣門者曰適御筆中丞除翰
林學士日下共職矣安中歎曰吾禍其在此乎自是京
之勢益盛

此據長編所載王
安中行狀修入

丁酉西蕃王子益麻党征

降見于紫宸殿 癸丑貴妃王氏薨 遼主自燕至陰

涼河置怨軍八營募自宜州者曰前宜後宜自錦州者

曰前錦後錦自乾自顯者曰乾曰顯又有乾顯大營凡二萬八千餘人屯衛州蒺藜山 冬十月乙卯朔御明堂平朔左个以是月天運政治布告天下又頒來歲歲運歷數 戊寅中書侍郎侯蒙罷蔡京惡之也 辛巳


詔以來年正月一日祇受受命寶時得于闐大玉踰二尺色如截肪帝乃製為寶文曰範圍天地幽贊神明保合太和萬壽無疆篆以蟲魚制作之工幾於秦璽號曰受命寶帝甚重之曰八寶者國之神器至於定命乃我

所自製也 十一月庚寅手詔太師魯國公蔡京自再
還廊廟于今七年邇者章疏十上卻之復來繼以消息
盈虛之理告老乞骸祈於得請而後已朕體貌元老不
欲固違可五日一朝次赴都堂治事恩禮寵數並如舊
制 辛卯鄭居中起復為太宰以余深為特進少宰兼
中書侍郎白時中為中書侍郎 壬辰復置醴州 丙
申太傅致仕何執中卒贈太師清源郡王諡正獻 升
石泉縣為軍 十二月甲寅朔有星如月 丁巳以薛

昂為門下侍郎 甲子金成州都統達魯克等敗遼秦
晉國王淳兵于蒺藜山淳初遣達魯克書議和達魯克
告於金主金主曰歸我行人薩喇及送阿蘇等則和議
可成淳軍蒺藜山達魯克及知東京事倭楞等進攻顯
州遼怨軍帥郭藥師乘夜來襲倭楞擊走之達魯克遂
與淳戰淳敗走達魯克追至阿爾占陂遂拔顯州於是
乾懿豪徽成川惠等州皆降于金遼主下詔自責遣額
爾欽察喇與大公鼎諸路募兵 戊辰詔天神降于坤

寧殿刻石以紀之 庚午以童貫領樞密院 命戶部
侍郎孟揆於上清寶籙宮之東築山以象餘杭之鳳凰
山號曰萬歲周十餘里 辛未御筆改老子道德經為
太上混元上德皇帝道德真經 癸未以張商英為觀
文殿大學士 是歲大旱帝以為念侍御史黃葆光上
疏言蔡京彊悍自專侈大過制無君臣之分鄭居中余
深依違畏避不能任天下之責故致此災不報且欲再
上章京權勢震赫舉朝結舌葆光獨出力攻之京懼中

以他事貶知昭州立山縣又使言官論其附會交結泄
漏密語詔以章揭示朝堂安置昭州王仔昔倨傲而戇
帝待以客禮故遇宦者若僮奴又欲羣道士宗已林靈
素忌之與宦者馮浩誣以言語怨望下獄死



資治通鑑後編卷九十九